

54775
共6册



圖書庫

南齋集



文字之難莫難於潔其非標舉新穎增削字句之
謂謂夫性情遠而氣骨適也柳子厚之論文也曰
參之太史以著其潔夫文之不潔者莫太史若矣
左史記言言爲尚書太史采虞夏之文全載於策
而周書概從刊落甚至以文侯之命爲晉文公潔
者固如是乎右史記事事爲春秋太史掇拾左氏
而其不合於左至五十二事之多魯衛晉楚之世
家參之年表牴牾舛繆何慮數十百件文之潔莫
潔於子厚矣而低首下心岸然品目之以潔而後
世莫敢議其非所謂性情遠而氣骨適者惟太史

足以當之而不愧也矣此言文也而詩尤難魏武
之沈雄越石之清剛潔也潘陸以藻麗參之而亦
潔靖節之沖淡康樂之自然潔也顏鮑以縛采參
之而亦潔辟之埃壒全集哇咬間作遺世獨立之
仙人振衣長嘯與天風海濤相應和而羣響皆寂
此豈與夫木客之清吟幽獨君之夜語風蟬露緯
之鳴趯而以不食煙火爲潔者比乎吾友馬君半
查志潔行芳秕糠一切太史所謂皜然泥而不滓
者也詩不立異亦不苟同醞釀羣籍抒寫性真吸
三危之露不足以喻其鮮榮攘九華之雲不足以

方其縹緲煦西顛沆瀣之氣不足以比其清神而
澡魄舉一世之工於詩者吾未暇以悉數也以吾
黨論之姦窮怪變震眩耳目才力之雄獨於吾半
查者有矣至若幽窗聞坐孤鶴掠空夜氣既清天
心來復半查溲然寫孤韻而抽清思釋躁平矜凡
襟盡滌學之無從追之不及微茫之介形似之辨
非夫超絕塵壒之外孰與析其旨乎半查抱桓山
折翼之痛過時而悲頽然就老余亟勸其自定一
集以遺後嗣故特標潔之一字如子厚之所以品
題太史者而以目吾半查且願與天下之深於詩

者共論之至或議吾爲阿私之好豈暇屑屑辨哉
乾隆龍集辛巳長至前一日湖壩老友杭世駿撰

馬君佩兮與其兄秋玉皆以詩名東南家有別業
極林泉之勝二十年來文酒之會無虛日或賓客
不時至對牀風雨聯吟不輟人以是知君兄弟之
篤好爲詩也已而秋玉歿君絕筆不爲詩至今終
年鍵戶若初不能詩者人以爲君之爲詩特以其
兄故而非其真好也余獨以爲不然夫君二十
年來之於詩無不與兄同之今又奚忍獨爲之歟
況今日之所遊處皆曩者塤箎唱和之地而謂君
能復晏然吟嘯於其間哉或曰子夏既除喪而見
予之琴和之而不和彈之而不成聲作而曰哀未

南齋集 序
忘也先王制禮而弗敢過也是則父母之喪必有節而況於兄乎雖然情之所至弗可強也在易小過之象辭曰喪過乎哀夫喪之過於哀聖人特不以是強人而未嘗不深取也嗚呼詩緣情而作者也吾於君今日之不爲詩而益知君之深於詩也此詩之本也至君詩瀏然以清窈然以深世之工詩者皆能識之余故弗論也乾隆庚辰八月秀水同學弟蔣德拜書

南齋集卷一

冷泉亭

祁門 馬曰璐 佩兮

鐘韻一星星幽尋獨此亭山從入寺好泉欲過時聽冷氣怯春服清暉隱翠屏更來巖下坐刻石紀曾經

宿新菴

投止山中住閒房對白雲有僧皆素侶無飯不青芹泉脉通牀下竹聲清夜分我無三宿戀臨去若離羣

南齊集 卷一
半山看桃花

山光燄燄映明霞燕子低飛掠酒家紅影倒溪流
不去始知春水戀桃花

過李氏園亭有懷

重到林亭亦偶然故人江上隔風煙花邀竹引剛
三月燕乳鶯飛又一年

甬東全謝山將北上見過山館因留小集明
日謝山以四截句見投依韻奉荅卽以送行
番番花事已成塵曲徑逢迎過酒人黃鳥綠陰新
雨歇未能留得渡江春

握蘭同上木蘭舟名字含香 帝里遊風物無多

待題咏揚州紅藥綻梢頭

許我抄書復易書郵籤卷帙百璠璣伐山網海甄
收遍合把縑緗補石渠

纔得相攜遽話離三年衿契寸心知春明門外南
來鴈肯向西風憶此時

夏日雨後

三伏此清嘉窗開鳥語譁殘陽半高樹疎雨在荷
花小破石牀夢欲分鄰圃瓜幽情正迢遞坐待月
痕斜

劍歌答洽人王二

寶氣橫空星斗寒秦君趙主等閒看平生自喜無
恩怨不佩吳鉤佩楚蘭

已酉孟春雪霽邀裴琴泉管水初吳柳溪張
凝思集南齋

書林諸君才思絕夜半窺書眼如月相將無可奉
清歡留得晴窗一堆雪雪裏梅枝間竹枝擎杯莫
唱春風辭春風吹過秋風度共看孤羸據深處

春日送金壽門之河東

敲門摘摘當日斜故人持贈青蘭花深杯滿注醉

復醉無計為君重柅車太行此去三千里夢裏應
思浙江水春衫挽住四分春珍重劉郎莫先起

過漢原朱丈寓居蒙投雅音因次韻奉答

竭來乘暇叩書關屐齒經過印蘚斑三月飛花春
漠漠一林細雨鳥喧喧圖經手補幽遐發時修
邑志丹訣

心成大小還八十鬢顏如四十偶然談笑絕躋攀
族著儒宗姓氏芳披風如在五經堂上階花竹自

和氣對客衣冠生古香邑有輿人歌祖德令祖曾為
祁門令

詩多前輩載青緇百年耆舊惟公在投以瑤華愧
報章

梅花卷六絕句

傷心浩劫歷恒沙不見當年萼綠華
一幅生綃當哀此招魂何處更羊家

玉骨珊珊絕點塵幾生脩到爲何人
無根更灑無情雨似拭啼痕怨早春

千山明月萬山空兩地茫茫恨不同
誰道羅浮香雪海絕無消息鳥聲中

飛空幻影雪粼粼不是瑤臺總不諳
折得橫枝歸斷譜任他春色遍江南

惆悵幽芬託暮雲風期林下日微曛
冰窗雪檻一

回首忽漫相思疑是君

玉釵常挂千年恨縞袂空縈午夜心
祇有冰絃寫嗚咽可憐誰復是知音

山樓望雨和吳柳溪

把君詩句上樓看遠樹移陰作晝寒
一片江南江北雨吹來都在曲闌干

山館聽汪澹亭月下彈琴

此夕因君憶翠微冷然孤館月臨扉
長松瀉影竹搖壁中有寒泉一道飛

孟秋望後一日看山樓荅柳溪前夕玩月之

作

七字吳郎畫不如倚闌風袖逼空虛清圓也被多情惱自入閒吟漸減初

松寥閣夜起用薩天錫焦山題壁韻

清絕不成寐嵐霧滴如雨披衣山鐘動靜聽佛名數木末色未分江空見行路寥寥物外心目送滄波去

海嶽菴

絕代風流今已無碧梧蕭瑟水煙孤西風門巷帆初卸北固樓臺日正晡世上爭傳寶晉帖墻隅獨

弔研山圖不堪零落衣冠後剩有臨江宅一區

辛亥九月十日同厲樊榭陳對鷗汪被江家

兄懈谷遊真州吳氏園亭用庾子山梨紅大

谷晚桂白小山秋平字爲韻

清遊續佳節幽興在園池江近澄波碧鷗閒片席遲人情猶戀菊霜意正摧梨獨有探奇者飄蕭似不知

日高林翳散宛轉細滕通漫水魚梁北空亭蓮葉東及時杯重把後日約難同剩取殘雲在芙蓉護冷紅

疇平皆可望樹好更須攀選勝不無意分題先解
顏歸禽明落日眾葉響空山難得朋樽合都成如
此閒

寸寸碧瀾秋寒蟾共一樓茶聲分客聽竹色夾煙
流興異剡溪盡禊同蘭渚脩明年春及健合買五
湖舟

送吳笙山由金陵歸豫章

巾褐南昌叟關心章水遙長腰三頓缺短刺一時
銷梵夾標年月行勝載寂寥林棲隨地有無計託
鷓鴣

芳草正芊眠中濡水接天梅花分手地桃葉過江
船夢遠憑雙鯉家貧少薄田閒吟誰慰藉新月尚

嬋娟

笙山數年前納麗
曾賦月嬋娟詞

荅友人問近日所詣

幾回牽挽幾遲留百丈環環上水舟恍似巫山山
下路三朝三暮見黃牛

凝思贈墨賦謝效山谷體

藏書不及李公擇蓄墨已視蘇東坡多君作詩妙
持贈七十九中增兩螺

君房雅製擅往代冷劑不數于魯方元元靈氣尚

如石何以喻之雙琳瑯
西陂老人酷嗜古春綠一池曾賦詩嗟哉蟲魚欠
箋釋慚愧松風入硯時

鐵佛寺木香繁茂可觀往遊其下撫今追昔
因悼雲公

夾竹爲籬一徑寬長年清蔭徧簷端重過舊院鐘
聲斷空見高僧塔影寒風景易成來去恨花香都
作水雲看日斜徙倚渾無語獨鳥悲春下石闌

過紅蕉山館有懷項窳民

庭隅綠葉正扶疎奈爾全家返故廬三版輕船共

妻子舊房空賸一牀書

山館聽雨

一夕山房雨能生入耳涼不離新竹徑還灑舊莓
墻對酒吟元亮停琴憶子桑方知幽寂地可以聽
浪浪

積雨

夜夜窺牛斗生憎玉井星窗前有梧葉點滴豈堪
聽秋老關人事陰多損性靈祇羸階畔草不改舊
時青

秋霽集看山樓得山字

秋色矜新霽憑闌此解顏雲涼花氣薄天淨鳥行
閒喜有三間屋還添一角山何當諸勝侶吟望不
知還

重陽前一日偕同人出郭步至紅橋而返

緩步郭門北蕭然淡我心青林疎返照紅舫出幽
澗倦鳥相逢少殘蕪入感深闌干閒倚處已覺暮
涼侵

共有三秋約難尋九里街花寒綠斷塹酒熟入新
懷清眺意殊得近遊歸亦佳爲君留逸興風雨詠
蕭齋

香遠樓晚眺

寒蕪隔水殘點點飛鴻暮雲物已蕭涼斜陽復疎
樹遙天望不窮冲襟託豪素

已未祀竈日有感橘堂先兄次西唐韻

酒闌燈炧序頻更十五年前此日情依舊黃羊祭
司命重來白社訪袁生風琴罷弄聞三歎西唐先
有詩來斷
鴈離行隔幾程讓美分甘兩瘦弟至今贏得淚河
傾

茅菴

學佛今真箇幽棲昔未尋以茲最佳處清我出塵

心七葉半吹雨有娑羅數株一燈深映林忘言堪永日簷際落雲陰

種松

樓前新種青松樹高幹亭亭已出林蒼翠尚留雲外色堅貞先有歲寒心雨窗入夜懷幽澗風檻流聲和玉琴可得著書相伴老白頭長日坐清陰

盆蘭雨中

微雨潤百物長養荷天公幽蘭侶貞石芳香儼林中數葉碧於畫一花高出叢無心隨衆草契此空山空

題方南堂歸山圖

翻飛已是投林鶴舒卷嘗輸出岫雲試展畫圖談往事十年京國獨憐君

高西唐五十

君當弱冠余齟齬轉眼看君半百人鬚鬢共驚成老大衣冠不解逐時新閑窗坐雨冬經夏木榻論文暮及晨豈獨杯深欣對把笑談隨處見天真

常愧詩歌得報遲稜稜鶴骨總清羸身殊金石交偏久年到蒼華喜可知與西唐常有不能永年之憂湖海聲名非所

慕煙雲翰墨亦吾師祝君惟願長相見會待良規

最後期

題竹屋高丈蕉窗讀易圖

一編窮歲月白髮未相侵自守邱園素能窺天地
心精微該六學餘事入孤吟夢覺吞爻後甘蕉正
午陰

高梧和方邴鶴

萬木欲黃落高梧奈晚霜秋聲不可聽客思滿虛
堂更走翻階葉時生繞榻涼卻憐朝日上一半露
林光

空林踏葉時在黃鶴山中

脫葉積無路閑來思不禁試憑青竹杖還憶昔行
吟日落羣峯迴天寒萬壑陰蕭蕭雨聲裏又欲過
前林

辛酉仲春過唐南軒庶常寓齋題陳道山畫
葵用東坡題畫葵韻

春簾捲晴晝名酒開西涼何因疎梅叢見此秋日
光江南舊詩客肝鬲森有芒寫此傾側不能事過
老昌檀金疑閣浮頭冠學華陽午夢浥風露覺來
聞暗香

春陰

南齋集 卷一
未見重雲散其如雨意何吟衫添後薄花蕊落時
多爐氣消長晝墻陰冷綠蘿春光能幾日惟有放
狂歌

東謝山庶常

茅簷捧檄正躊躇天上傳來一紙書祇道無媒邀
並蓄豈知當路有溫噓量才未信青雲近將母唯
憂白髮疎孤負明良憐下士子虛焉敢托相如
高吟曾說夢良辰劉井柯亭景色新瓊陛有梯咸
奮翼衰宗誰託欲沾巾縱思驅驥追先甲可忍言
離泣老親留得酬知方寸在他年猶是掃門人

送春效青邱體和陸南圻

一見一回老何堪春又歸莫上高樓去風花處處
飛花枝有意留春住經得天涯幾風雨花南水北
綠陰多黃鳥聲聲喚奈何喚奈何春不顧一片離
情誰與訴期君更復動愁思望斷斜陽入深樹

憶春用前體重寄南圻

紅紫乍成非春歸那得追柳枝風淡淡燕子語依
依離情不斷吟情裏知逐楊花渡江水可憐酒醒
夢回時也似懷人千萬里相見是明年相憶此樓
前重來更向憑闌處一望平蕪接遠天

街南書屋十二詠

小壘隴山館

愛此一拳石置之在庭角如見天地初遊心到廬
霍

看山樓

隱隱江南山遙隔幾重樹山雲知我閒時來入窗
戶

紅藥階

孤花開春餘韶光亦暫勒寧藉青油幕徒誇好顏
色

覓句廊

詩情渺何許有句在空際寂寂無人聲林陰正搖
曳

石屋

嵌空藏陰崖不知有三伏蒼松吟天風靜聽疑飛
瀑

透風透月兩明軒

好風來無時明月亦東上延玩夜將闌披襟坐閒
敞

藤花菴

何來紫絲障侵曉煙濛濛忘言獨立久人在吹香中

澆藥井

井華清且甘靈苗待灑沃連筒及春葩亦漑不材木

梅寮

瘦梅具高格況與竹掩映孤興入寒香人間總清境

七峯草亭

七峯七丈人離立在竹外有時入我夢一一曳仙

佩

叢書樓

卷帙不厭多所重先皇墳惜哉飽白蟬撫弄長欣

清響閣

林間鳥不鳴何處發清響攜琴石上彈悠然動遐想

題姚蕙田蓮花莊圖

故人五載別沉思紛以積相望一水間有夢隔喧寂寄我煙舍圖卽此慰離析秋窗眼為明碧浪濯

花魄雲來蓮影涼風過蓮葉白想見千娉婷中有
微咏客況茲勝地初昔賢有陳迹遐慕渺何許趣
不減琴冊而我塵市人欲寫筆生棘寧足稱詩篇
庶用代箋尺安得插羽翰乘風振兩腋浩蕩白鷗
羣花間一吹笛

篠園種竹簡程泚江太史

風煙重見舊吟窩問訊橋西不厭過徑闢尚嫌寒
碧少窗虛已覺夕陰多王家舊事從敲戶白老新
方但間科只恐追涼無暇日分箋留客待如何

胡復齋先生枉過山館次韻奉荅

上巳已臨三月節春風着意到莓苔軒窗過雨逢
朝霽茗椀留賓愧不才解帶每聆花下語支筇還
上竹間臺先生胸次崢嶸甚收拾雲山句裏來

聞蟬

戛戛珊珊似有期一聲初動碧陰移曾經古木雲
飛處又到斜陽雨歇時陳迹漫疑齊女怨清吟誰
和玉谿詩庭閒院寂饒風露倚徧青梧一兩枝

盆荷和被江

翠葉扶風別樣裁近依闌角遠亭隈偶然便作陂
塘想忘卻汗泥手種來

時時辛苦注清泉幾日酣紅鏡裏鮮還是昨時疎
柳畔蕭蕭聽雨又今年

蓼花

荷花疎處蓼花紅大抵秋容淺淡中臨遠最宜煙
被岸含姿多是葉吟風眼明錦水鷗邊見畫到橫
湖雨外工何事山齋能爛漫夕陽裝點近簾櫳

送對鷗之天津和留別韻

預說音塵藉夢通十年燈火竹窗同春回南國君
翻去交重他山我未終沽上題襟寧落落竹西分
手太匆匆詩籤茗椀生離緒爪跡空留悵雪鴻

食白沙枇杷因懷沈寶硯

枇杷門徑晚陰陰又見筠籠摘露岑五月江南初
寄到一時風物入閒吟花思淡白寒天色味帶微
酸遠客心安得詩人同握手扁舟如畫過西林

甫白沙詩人善畫有
畫枇杷西林在白沙

葛震

環溪打魚食客

環溪本山居草樹屏穠冶疏池通暗泉空水一碧
瀉主人熟魚經種魚按魚雅坐客藕花中觀魚蓮
葉下堂策恣徜徉綸竿亦瀟灑時動靜中機不礙
為靜者佐饌玉一尺雪色照老瓦拌空放箸前風

味非外假林際忽風聲恍入菰蘆也詩尋漁具和
字向白萍寫江湖兩相忘況復近蘭若開士期旋
來昏鐘已頻打微吟出竹林皓月在平野

坐文上人西窗

窗開雙樹間樹老寒雲裏坐處似無人閒心淡如
此時聞葉下聲焚香悟微旨

試燈前一日聽西唐誦懷人諸作

春塵動晴陌冷趣落煙蘿離緒誰能遣清吟可奈
何以君新句好感我故情多卻喜燈明夕同心一
處過

南園春柳詞和汪恬齋

城隈春水赤闌橋一片晴波翠袖招我自獨來先
欲醉好風頻動最長條

飛花未許點春衫也學腰支鏡裏涵鶴渚魚汀通
一望只疑清夢落江南

歌板聲沉日易西新詩多爲月明題
園外卽明月橋黃鸝可
是耽吟者洗硯池頭並坐啼

初夏閔玉井邀集休園

歌吹喧中天漠漠一片清陰占林薄揚州池館競
繁華掃去朱丹留淡泊東鄰水竹對門居淺夏邀

遊殊不惡隔日先教瘦鶴知中宵預夢遊魚樂行
來夏木挂寒藤依舊石池橫畧徇境寂惟聞翠鳥
呼窗虛只有濃雲幕不須陳迹感滄桑未免流光
判今昨碧水難樵石無語樵水語石皆園中額名我有吟情何
處着強將淡景入豪端開遍亭邊萬丹若

暑雨初收同符藥林登樓望隔江山色

西南竹枝上縹緲江南山山素客亦故離合常相
關幾日悵如失一朝欣得還初浮髮半髻漸露着
雙彎淺笑白鳥外微顰翠煙間濕雲捲不盡草木
鬱蒼然忽爾夕彩散遙林含日殷闌干落爽色使

我襟懷閒

潛菴看竹

綠色到鬚鬢蒼然一徑多晴雲山隱見午盃鳥經
過地僻全離俗門閒半映波獨吟留不去幽意欲
如何

雪後過行菴

屋上三重茅窗間一痕白清霰入寒梅飛花點幽
客起予者鄰鐘吟詩度日夕

壬戌正月十六日同符藥林陸南圻家兄懈
谷月夜遊平山時從陸氏山莊飲散

春來到處結遊蹤
兩度平山聽暮鐘
乘興又隨明月出
好風吹動舊吟筇

一徑晴雲擁翠微
松風聲裏叩禪扉
道人問客來何處
碧水池塘放鴨歸

到山剛是月昏黃
不辨花光與月光
滿眼梅花滿身月
縱無花處亦聞香

縹緲虛林畫不成
茱萸灣口遠煙橫
石亭南去空於水
認作澄湖一角明

吟殘花氣香成陣
坐久橋心月未中
閒憶雷塘弔宮井
微醒已醒碧瀾風

分頭連手鬧春城
斂盡歌塵夜色新
千古山靈託知己
清光只付兩三人

續篠園花下看燈歌

五日不來花應愁
華燈晃漾光悠悠
鷗閒鶴散未冷落
復此花下成清遊
一杯在手月相向
留得餘香北枝上
池上歌聲度水來
水映橫斜似初放
以燈寫花花傳神
能使幽艷回陽春
但恐明日風還起
一點相思老卻人

西疇約北郊
看梅復以雨阻
午餘集行菴
分韻得夜字

我聞梅花招如見彈思炙奈何晴雪香輒作冷雲
化撩愁雨排簷入夢酒滴夜所喜午放晴衝泥來
樹下清興發吟餘疎香出竹罇厭飫雖未能眼明
一枝亞

謝山以詩索汾酒後二日過山館又出潞酒
飲之復以詩來用次原韻

嫩碧來汾曲移封到海濱不堪充上頓聊用餉嘉
賓釀法河東舊詩篇開府新可能成薄醉別號鑑
湖春

赤翟非雄服黎侯本附庸借將春水色醞作夏雲

濃

潞酒以汾酒為母

一盞羞瓠罄千鍾愧麩封汾清豈醜薄

兼可洽歡悰

五賦樓分咏

漢銅小博山爐

銅盤承博山斑剝蓮花形火傳自炎漢杯覆由滄
溟莫言製器小煙散九點青

唐飛白碑額

唐書飛白三二者非其匹獨愛顯慶年字如素鳥
歟以之揭齋中想見聖帚筆

宋紫石端硯

西齋集 卷一
馬肝選上巖誰歟劈巨斧未蒙公權評當入蘇氏
譜鸚之與鵠之相對吾負汝

宋磁筆架

螭隨墨雲騰峯作墜雨濕珍重越秘密曾經海嶽
識若配玉蟾蜍對之應自泣

上巳日雨中同人集畢氏園亭效白香山和

裴令公雜言體

元已光風駘蕩園林細雨廉纖閑煞橋邊畫舫遙
看竹外青帘酒人來不速詩句冷無嫌水楊柳憐
門掩餅桃花愛粧添南澗東堂脩故事何如今日

醉厭厭

花畦四截句

探春預約水邊人搓就鶯兒柳色勻卻是名園春
尚鎖亞枝紅未放鮮新

漠漠輕陰故苑墻司花何處儼明璫朝朝爲乞曼
陀雨熏取新詩徹底香

弄袖風微趁酒旗紅橋煙景漸迷離誰人靜向空
亭坐解惜花陰一寸移

清晨分送馬頭籃風俗吳中我舊諳養得藥闌煙
甲大又將芳事過江南

花畦主人
本吳人

同人攜茗集蟬書樓試惠山泉用涪翁韻
名泉一甌山雲俱策勲茗事宜特書松風聲中發
新咏誰於領下探驪珠我已年來厭芳腴舌本難
澆百不如竟須煎點破午睡與君共說芙蓉湖

雨後兩明軒看盆荷再用涪翁韻

猛雨驟來涼風俱冷香一陣飄殘書兩明軒子苦
蒸鬱賴此濁水摩尼珠紅花白花互芬腴波間微
步可得如引人詩思在蓮葉轉憶江南十頃湖

小集晚清軒有懷厲樊榭今日渡江仍疊前
韻

城南會者七人俱鈞元挾隱徵僻書武林詞客此
中去得不滄海嗟遺珠乘流而行瘠非腴柔櫓一
枝煙鷗如晚來孤咏丹陽路也復懷人雨半湖

上元夜雪

誰將南陌千燈影幻作東齋一夜明玉燄銀花自
天與謾隨兒輩較濃清
新年喜見第三雪去夏嗟慳雨一犁幾日桃花春
漲起穰田省得費豚蹄

初夏雨後讓圃登樓野眺

層樓俯郊坳窗戶翳松櫟濕雲天際流翠雨衣上

滴斜陽忽穿漏遠近皆歷歷何來牛背童風前恣
橫笛復見原上村桑陰逢荷蓀廣韻徒歷切義同墟煙暖微
微林鳥聲寂寂憑高眺聽間頓爾塵襟滌便欲買
春田終焉狎沮溺

喜雨時病初起

懶慢閉書閣經時復逾年好雨隨客來幽懷時一
牽既蘇病骨健更浥孤花妍微吟淡以豫何止為
春田

花畦看芍藥

怊悵尋芳未有詩等閑已是袷衣時不因繭栗餘

香在過卻春風總不知

晏温天氣最佳辰一一花頭膩粉勻我自昨來看
較早滿身風露尚無人

癸亥九日同人集行菴出仇十洲畫五柳先生像作供以人世難逢開口笑菊花須插滿頭歸分韻得笑字

閑居愛重九陶公真語妙行菴晉樹旁寂不殊巖
嶠何況宿雨收微風正吹帽開我竹間門把袂先
一笑坐中何所有有五柳遺照當時老畫師水墨
恣騰踔但取意古淡詎在形逼肖甲子不可詳祇

覺風骨峭緬想千載心處潛德彌耀再拜誦公詩
超然遺俗好日落孤煙橫天空斷鴻叫歡持酒盈
觴彷彿見高蹈停雲近所敦回首語同調試共折
黃花聊以當蘋茗

題汪蛟門先生三好圖

寄興惟憑老畫師披圖如挹舊風儀尊壘未過揚
雄宅絃管曾吟白傅詩蠹簡一函猶手澤高梧百
尺已孫枝江鄉耆舊如公少起敬同於社祭時

田孺人節壽

遺孤亦偃蹇天地歎終窮冷守松間雪辛嘗蓼節

蟲宣揚待劉向頌禱異成風食報知何在芳名百
世中

題高南阜醉禪圖

掃除煩惱安心後養就陽和閉目中兀兀騰騰直
活計海天空濶一冥鴻

懷樊榭西疇南圻玉井遊攝山

羨爾翦江去晴巖一繖張霞心留信宿詩思滿齊
梁捨宅高風邈探幽逸興長松根如可待也擬續
遊航

聞復有白下之行詩以簡之

昨日山中青鳥至丹砂遙寄抵封緘乘潮又放金陵棹訪古應閒白木鐮一代故宮依落葉六朝遺事入吟衫就中莫唱桃根曲恐惹深閨怨布帆

戲謂

南圻時初納麗

行菴三絕句次復翁韻

冷雲多處卽林廬一把香茅一卷書留得遠公舊香火不妨隨地印真如

瓦溝黃葉隔墻留樹老何人戀不休暫借吟詩暫觀靜也須當作畫圖收

麤了壺觴百不論風篁門徑儼山村閒中無復心

花發只有梅花自返魂

金陵移梅歌

春從何處來凍鳥啁啾遍莫將江北認江南坐待簷間集微霰紅船遠載長千里暈點青銅失妍美十三株比鴈柱行直截雲帆渡江水故人金陵遊示我金陵詩清辭脫口香在頰又見槎枒鶴膝枝我慚未攬江山勝點綴坡陀托幽興客土親培帶月鉏怪石嶒峯稱季孟三徑年來總穢荒新移綠竹才過墻明年竹裏羅浮夢應共飛花到建康

淹菴

小雪從成市論園菜把將色堪鶯管並味借虎形
良寸寸窮冬御家家臘甕香若為稱旨蓄朝暮得
先嘗

遊建隆寺用沈傅師遊道林嶽麓寺韻

天水遺事不可論長淮水流駒隙奔頽垣縈繚紺
宇出令人彷彿思都園太祖時王溥
獻淮南都園苔昏細辨建隆
字當年曾降黃屋尊券賜黑王此移鎮鷺鳥豈受
樊籠樊慰撫虛煩六宅使江城落日烽煙昏我來
尋僧訪御榻空廊惟有寒雲屯鐘魚粥鼓亦消歇
何者得為甘露門事同畫壁了無迹庫藏遺弩空

留痕侯王螻蟻一瞥耳千年老樹蟠枯根不如揚

州醉劉坦鯨吞日日思開樽

事見南
部新書

光化塔前敗葉

墮壽寧寺畔風鴉翻古今邱貉可勝歎輕者非輕
軒非軒牽連並及建炎代御容曾奉瞻羣元

分賦雪中故事得龍門

文僖西都守歐謝從事官都廳閑話外相遇非一
端至今傳龍門暮雪凝闌干高情並嵩少三十六
峯寒

消寒初集晚清軒分得蒸韻

消寒猶記去冬曾弱線纔添興劇乘歲籥一週銀

箭水詩情無盡佛龕燈早梅晚菊人如舊炙硯裁
箋我亦能從此聯吟過九九又留故事隔年徵

松聲分韻得水字

清音何處來謾謾如流水入我冰弦中置君巖戶
裏能傳歲晚心一寓忘言旨斷續灑衣涼塵襟可
以已

南齋集卷一終

